

आकाशवाणी जयपुर-अजमेर

प्रादेशिक समाचार

दिनांक 10.08.2025

समय: 18.45 बजे

- ☐ प्रधानमंत्री फसल बीमा योजना की बीमा क्लेम रकम को वितरण जलसो काले झुंझुनू मांय-केन्द्रीय मंत्री शिवराज सिंह चौहान मौजूद रहवेला।
- ☐ राज्य सरकार पेंशनर्स ने राहत देवण सारु राजस्थान राज्य पेंशनर्स चिकित्सा रियायती योजना-2021 मांय संशोधन करी ज्यो।
- ☐ प्रदेश मांय हर घर तिरंगा अभियान रे तैत न्यारी-न्यारी गतिविधियां आयोजित करी जावे।
- ☐ प्रदेश मांय न्यारी-न्यारी ठौड़ां आज हळका ऊं मझळा दर्जा की बिरखा-जयपुर समेत 14 जिलां मांय आज बिरखा रो येलो अलर्ट।

000

प्रधानमंत्री फसल बीमा योजना की बीमा क्लेम रकम बाटण सारु जलसो काले झुंझुनू मांय व्हेला। जलसा मांय केन्द्रीय कृषि अर किसान कल्याण मंत्री शिवराज सिंह चौहान अर मुख्यमंत्री भजन लाल शर्मा समेत जन नुमाइन्दा मौजूद रहवेला। ई दौरान देशभर रा काश्तकारां ने साल 2023-24 अर 2024-25 रा फसल खराबां की रकम बैंक खाता मांय हस्तान्तरित करी जायेला। और ब्योरो म्हाणा खबरनवीस ऊं-

000

प्रदेश मांय पेंशनरां ने राहत देवता राज्य सरकार राजस्थान राज्य पेंशनर्स चिकित्सा रियायती योजना-2021 मांय बदलाव कर्यो है। रोकड महकमां कानी ऊं काड़ी ज्यी अधिसूचना मुजब पेंशनर्स सारु आरजीएचएस योजना रे तैत अबार आउटडोर चिकित्सा सुविधा मांय दवाइयां अर जांचा सारु तैय हद ने बधावण सारु चिकित्सा महकमां अर वां रे तैत राजस्थान स्टेट हेल्थ एश्योरेंस एजेन्सी ने शक्ति दीरीजी है। इण रे तैत ओपीडी दवाइयां तैय हद 2 लाख रिप्यां ताई रा बढावा सारु एजेंसी रा अतिरिक्त सी. ई.ओ. अर संयुक्त सी.ई.ओ., 2 लाख ऊं 7 लाख रिप्यां ताईएजेंसी रा मुख्य कार्यकारी ने अधिकृत करी ज्यो है। वटे ई 7 लाख रिप्यां ऊं बत्ती सारु चिकित्सा अर स्वास्थ्य महकमां ने अधिकृत करी ज्यो है। ध्यान जोग है कि तैय हद की करम मांय बढवार सारु पैला आ शक्ति रोकड महकमां रा तैत ही। मुख्यमंत्री रा ई फैसलां ऊं पेंशनरां ने आप की ओ.पी.डी. दवाइयां अर चिकित्सा जांचा की हद मांय छूट सारु अबे अर्जी देवणो सरल व्हेला। पेंशनर्स ई सारु आरजीएचएस पोर्टल मांथे ऑनलाइन अर्जी दे सके है।

विदेश मंत्रालय की पहल माथे भारत दौरा माथे आया लैटिन अमेरिकी देशां रा 24 कंटेंट क्रिएटर्स रा नुमाइन्दा मण्डल आज जयपुर मांय उपमुख्यमंत्री दीया कुमारी ऊं मिल्यां। नुमाइन्दा मण्डल मांय ब्राजील, मैक्सिको, अर्जेंटीना, चिली, कोलंबिया, पेरू, पनामा देशां रा नुमाइन्दा भेळा है। 9 ऊं 15 अगस्त ताई राजस्थान प्रवास रे दौरान अ सगळा भारत की मजबूत विरासत, जीवंत संस्कृति अर विविधतापूर्ण जीवन शैली ने देखेला। उपमुख्यमंत्री कह्यो के ई तरह की पहल ऊं अंतरराष्ट्रीय थर माथे भारत की सांस्कृतिक धरोहर अर सैलाणी आस को असरदार प्रचार-प्रसार होवे है।

0000

सेना प्रमुख जनरल उपेंद्र द्विवेदी ऑपरेशन सिंदूर ने रणनीतिक दीठ ऊं महताऊ अभियान बताया। वणा कह्यो के ओ अभियान सैन्य सटीकता अर राजनीतिक स्पष्टता को समन्वय हो। आईआईटी मद्रास मांय पढेसरां अर शिक्षकां सामी बोलता वणा कह्यो के 22 अप्रैल ने पहलगाम मांय पाकिस्तान रा आतंकवादियों रा कायराना हमला रे पछे ई ऑपरेशन की योजना बनायी ज्यी है अर उण ने कामयाबी पूरण अंजाम दीरीज्यो।

000

प्रदेश मांय हर घर तिरंगा अभियान रे तैत न्यारी-न्यारी गतिविधियां की मार्फत देश प्रेम की अलख जगायी जावे अर साथै ई बत्ती ऊं बत्ती लोगां ने अभियान ऊं जोड़्या जावे। भरतपुर रा बगीचा मांय आज तिरंगा रंगोली सजायी ज्यी अर देशभक्ति की थीम माथे चित्र अर भाषण होड़ व्ही। ई कड़ी मांय काले संवारा तिरंगा साईकिल रैली निकाळी जायेला। बालोतरा जिला मांय हर घर तिरंगा हर घर स्वच्छता अभियान रे तैत न्यारा-न्यारा कार्यक्रम व्हा। पंचायत थर माथे मनरेगा मजूरां जलाशयां अर मार्गों की

सफाई करी। पाली रा सोजत मांय अभियान रे तैत आज लोगां अर लोक कलाकारां तिरंगा रैली निकाल र देशभक्ति रो संदेश दियो। पाली री युवा लेखिका आयुषी राखेचा आकाशवाणी ने कविता री मार्फत तिरंगा रो महत्त्व बतायो।

000

चुनाव आयोग देश रा न्यारा-न्यारा राज्या अर केन्द्र शासित प्रदेशां रा 334 रजिस्टर्ड गैर मान्यता वाळां राजनैतिक दळा ने सूची ऊं हटा दिया है। ये दल साल 2019 ऊं 6 साल ताई चुनाव लड़ण री एक ई जरूरी शर्त पूरी नी कर सक्या। आ दळा रा दफ्तरां रो ई कोई अतो पतो नी है।

ई सूची मांय राजस्थान रा भारत वाहिनी पार्टी, नेशनल जनसत्ता पार्टी, राजस्थान जनता पार्टी समेत नौ दल भेळा है। देश रा राष्ट्रीय राजनीतिक दल, स्थानीय अर पंजीकृत गैर-मान्यता प्राप्त राजनीतिक दल, जन-प्रतिनिधित्व अधिनियम रा नियमां रे तैत चुनाव आयोग मांय पंजीकृत है।

000

प्रदेश मांय न्यारी-न्यारी ठौड़ां आज हळका ऊं मझला दर्जा री बिरखा व्ही। भरतपुर अर करौली मांय हल्की बिरखा व्ही। **पांचना बंधा मांय पाणी चौखी आवक होवण ऊं इण रा दो गेट खोल ने पाणी री निकासी करी जावे।** वटे ई झुंझुनूं जिला मांय ई केई ठौड़ां झमाझम बिरखा रा समचार है। **श्रीगंगानगर जिला मांय केई ठौड़ां बिरखा व्ही।** सिरौही जिला मांय माउंटआबू समेत केई ठौड़ां बिरखा व्ही। म्हाणा खबरनवीस बतायो के मौसम सुहावणो हो ग्यो है अर सैलाणियां री आवक ई बधी है। मौसम केन्द्र जयपुर मांय आज 14 जिलां मांय बिरखा रो येलो अलर्ट काड्यो है। इण मांय सीकर, जयपुर, भरतपुर, धौलपुर, अलवर, करौली, नागौर, सवाईमाधोपुर, टोंक, बूंदी, कोटा, चित्तौड़गढ़, अजमेर अर भीलवाड़ा जिलां भेळा है। आ ठौड़ां माथे गरज रे साथै हल्की बिरखा री आस है।

000

भीलवाड़ा जिलां रा काश्तकारां ई बार उन्हाळू साख रा रूप मांय खास तौर माथे उड़द अर मूंग री बिजायी करी है, जटे बिरखा बत्ती होवण ऊं पीळो रोग फैल ग्यो है। इण ऊं भीलवाड़ा जिला रा काश्तकार चिन्ता मांय डूब ग्या है। खेती मेहकमां रा संयुक्त निदेशक विनोद कुमार जैन काश्तकारां ने सलाह दी है **के मेहकमां री सलाह ले र कीड़ा मारण री दवा रो छिडकाव करे जिण ऊं फसल ने कीट ऊं बचाया जा सके।**

000

आज विश्व शेर दिवस है। शेरां ने बचावण अर हिफाजत रा बारा मांय जाग बधावण सारू ओ दिन मनायो जावे। जंगल रा राजा शेर रे प्रति जागृति लावण सारू आज गुजरात रा द्वारका मांय जळसो आयोजित करी

ज्यो। इण मांय केन्द्रीय वन अर पर्यावरण मंत्री भूपेन्द्र यादव सिरकत करी। वणा कह्यो के देश मांय शेर, बाघ अर चीता ने बचावण सारू करी ज्या जतन पर्यावरण आधारित संरक्षण मॉडल ने मजबूत करे है साथे ई दुनिया सारू सीख देवण रो स्त्रोत बण रह्यो है। ध्यान जोग है के गुजरात मांय लारला कुछ सालां मांय शेरां री तादाद मांय बढ़वार व्ही है। साल 2025 मांय आं री तादाद 891 व्हे ग्यी है।

000

राजस्थान लोक सेवा आयोग री कानी ऊं होवण वाळी उपनिरीक्षक-प्लाटून कमांडर रा 1 हजार 15 ओहदा री भर्ती सारू आज ऊं अर्जी प्रक्रियां सुरू व्हे ग्यी है। आयोग सचिव रामनिवास मेहता बतायो के अर्जी 8 सितम्बर ताई दी जा सके है। बणा बतायो के परीक्षा री तारीख आयोग री वेबसाइट माथे मुहैया करा दीरीजी है।

000

प्रदेश रा केई हलकां मांय धार्मिक अनुष्ठानां रो आयोजन कर्यो जावे। ई कडी मांय उदयपुर मांय गवरी लोक नृत्य अनुष्ठान रो आज ऊं आगाज व्ह्यो। 40 दिन ताई चालण वाळा ई उत्सव मांय लोक कलाकार थाळी अर मांदल री धुनां माथे धार्मिक प्रस्तुतियां देवे है। आं भेळी प्रस्तुतियां मांय घणी तादाद मांय कलाकार हिस्सो लेवे है। वटे ई पाली शहर रा न्यारा-न्यारा मिंदरां मांय झूला उत्सव रो आयोजन कर्यो जावे जिण मांय प्राचीन नक्काशी कर्या झूलां मांय कृष्ण रा न्यारा-न्यारा रूपा ने झुलाया जावे है। झूला उत्सव रो ओ आयोजन सावण म्हीना ऊं सुरू व्हे र ऊपछठ ताई कर्यो जावे। उठिने गोगामेडी मेळा मांय हिस्सो लेवण घणी तादाद मांय सिरधालू पूग रिया है।

000

केन्द्रीय खेल अर युवा मामलां रा मंत्री डॉ. मनसुख मांडविया कह्यो है के **‘संडे ऑन साइकिल’** पहल **‘फिट इंडिया’** अभियान ने एक आंदोलन बणावण मांय मदद करी है। डॉ. मांडविया आज नुवी दिल्ली मांय **‘संडे ऑन साइकिल फिट इंडिया’** कार्यक्रम मांय आ बात कही। वणा बतायो के अजै ताई देशभर रा 50 हजार ऊं बत्ती गांवां मांय पंचायत नुमाइन्दा ई अभियान मांय हिस्सो ले र **फिट इंडिया संदेश** रो प्रसार करे है।